

REGIONAL NEWS

HEADLINES:-

1. Mizoram State Policy Coordination Committee-te chu an chairman Chief Minister Pu Lalduhoma hovin an thukhawm.
2. Lokayukta-a thubuai la chinfel loh te CBI chhui turin ZPM Legal Department chuan ngenna an thlen.
3. Justice N.Kotiswar Singh leh Justice R. Mahadevan te chu Supreme Court Judge atan vawiin khan President Draupadi Murmu-i chuan a ruat.
4. Jammu & Kashmir-a firfiak ralthuam rip tak kengten nizana an kahhliam sipai panga chu vawiin khan an hliam tuar loin an thi.

<><><>

CM

Mizoram State Policy Coordination Committee-te chu an chairman Chief Minister Pu Lalduhoma hovin CM Conference Hall-ah an thukhawm a. Loan based progress partners, Zau Policy leh line department-te inkaihhraina lam thilte an sawiho.

Chief Minister chuan, kumin hi inpuahchah kumah an puan avangin kumin bikah hian hand holding policy chu lian takin an kalpui thei dawn lo a ti a. Sum dinhmun that dan azirin hmalakna an nei lian chho zel dawn a, chutihlain thlai thar lei tur pali an thlan tawh te erawh chu an lei ngei ngei thung dawn a ni, a ti. Meeting ah hian Member Secretary Pu Lalmalsawma Pachuau, chuan policy inkaihhraina duan tlangpui leh tun financial year-a budget Hand Holding sum dah hman chhuah dan tura duan te sawi fiahin hemi hnu hian an thu ngaihtuah langsar te chu Loan hmanga Hand Holding kalpui turah Credit Guarantee Fund Scheme for MSME hmanga 100% loan guarantee - progress partner te pek theih dan leh buaipui chhoh mek a nih dan te, PMEGP, KCC leh loan danga interest subvention pek theih tur zat te, progress partners thlan te tana training dan tur te, monitoring kalpui dan tur leh Hand Holding Policy official launching neih hmaa tihur tul awm thei te an ni.

Hei bakah hian Zau Policy kalpui dan tur ruahmanna leh Hand Holding Policy line department te inbuatsaihna tur thil pawimawh te pawh an sawi a ni.

<><><>

CM

Governor Dr. Hari Babu Kambhampati leh Lai Autonomous District Council Chief Executive Member Pu C. Lalmuanthanga te chu vawiin khan Raj Bhavan-ah inkawmin, Pu Lalmuanthanga chuan LADC harsatna leh mamawh hrang hrangte a thlen.

LADC, CEM chuan Gazetted post appointment leh LADC Fund hmuh, non-salary chungchangte, kum 20 liamta atanga tun dinhmun thlengin a tlangpui Governor hi a hrilh a.

Governor chuan hemi chungchang hi Nodal Department District Council & Minority Affairs-ah felfai zawk a kalpui a nih theih nan thlen thin ni se a duh thu a sawi a. Governor chuan Department atanga harsatna a awm loh chuan dan ang taka kal pui thin a nih tur thu a sawi a, Governor chuan CEM in an mamawh athlen te chu lo enzui anih tur thu a sawi.

LADC Chief Executive Member Pu C. Lalmuanthanga, hi Pu C. Lalsawmzuala, Chairman Town Committee leh Pu Thansiam, Deputy Secretary (GAD), LADC-te'n an tawiawm.

<><><>

ZPM

Lokayukta-a thubuai la chinfel loh te CBI chhui turin ZPM Legal Department chuan ngenna an thlen.

Vawiina ZPM Legal Department thuchhuahin a tarlan danin Mizoram Lokayukta-a case lian tak tak pending mek pathum Ropeway leh Skywalk chungchang te, NABARD sum puk hmanga Mizoram School thawmthat chungchang te chu ACB ten an la chhui mek a. Lengpui Airport sak chungchanga pawh Mizoram Lokayukta ngaihtuah turin a inchiah mek tih ZPM Legal Department te chuan sawiin heng case te hi mipui sum tam tak tih chingpenna ni ngei ah an ngaih avangin CBI ngeiin chhui tura an duh thu an sawi a ni.

ZPM Legal Department chuan Lokayukta danah Corruption case te chu chhui tura Lokayukta-in Order a chhuah atanga thla 6 chungza zawh tura tih a nih thu leh, an zo hmanlo a nih chuan thla 3 aia reilo extend anih theih tur thu tarlan a nih thu an sawi a. Hetihlai hian Ropeway leh Skywalk chungchang chu ACB chhui turin nikum May ni 30 khan referred a nih tawh a, vawiin thlengin chhui zawh a la nih loh thu an sawi a, Mizorama schhol thawmthat pawh kumin February ni 13 khan ACB chhui turin hlan anih tawh bawk thu ZPM Legal Department chuan an sawi bakah Lengpui Airport chu NGO pakhat Mizoram First te chuan ni kum 2022 March ni 14 khan Lokayukta ah Complaint anlo thehluh tawh a, a chhuina mumal tak vawiin thlengin a la awm lo nia an hriat thu an sawi bawk a ni.

<><><>

MNF PR

MNF Party chuan ZPM Sawrkar chu, an party mi Kuhva rah tawlhtu humah an puh a,

Vawiin khan thuchhuah siamin MNF Party chuan tunhnaia Vairengte leh a chhehvela Kuhva rahro bothlau zawn chhuah tuma hmalakna kal zelah ni Mizoram Police te chuan Phaisenah 407 trip khat leh an lakchhuahna Kudam atangin bag 145 vel man chhuah a nih thu puanzar a ni a. He kuhva neitu nia rin hi ZPM Champhai S Block Information Jt. Secy. nia hriat a ni an ti a, a unaunu te thlengin ZPM party mi ni a sawiin Phaisen a kuhva lo cheprelh saktu pawh Phaisen ZPM secretary a ni an ti.

MNF Party chuan ZPM chu an sawrkar atanga thlakhat chungza dan lova bungraw tawlh tihtawp tum ni a an insawi laiin, a tawlh thin tute zinga ZPM mi leh sa chu an mit an la siai khum zel a ni an ti a, Kuhva bag 5000 chuang bo chhui chhuak a, a rutu chungah hremna lek ngei turin an phut bawk a ni.

<><><>

CONGRESS

Mizoram Pradesh Congress Committee MPCC Treasurer Dr Lalmalsawma Nghaka leh MPCC hruaitu thenkhat ten vawiin khan Mizoram Health Care Society Chief Executive Officer Dr. Biakthansangi hmu in Mizoram Health Care tawp ta chungchang an sawi pui a.

Dr. Lalmalsawma Nghaka chuan, kumin April thlaa Health Care kal lai mek tawp chungchangah a zawh hnu a in enroll thar ngai, in enroll thar duh, natna hrang

hrang in a tlak buak si, in enkawl ngaihna hre lo te an lainat awm in an dinhmun a khirh hle a ti a. Cancer leh natna dang nei, in enkawl ngai in enkawl thei silo thahnem tak awm mek te pawh Health Care Scheme thar a awm hma tal an lo in enkawl lai lawk theih nan a ruahmanna siam sak a tul a ti a.

Health Care-a an limit hmang zo tawh si, in enkawl nan a Health Care a in nghat miharsa tam takin tunah hian buaina an tawh mek a, an in enkawl na a bik takin chemotherapy la mek te, dialysis tih ngai te leh natna hrang hrang a vanga enkawl ngai mek, in enkawl chhonzawm thei lo an awm chu a pawh an ti hle tih sawiin, an tan a bik taka ruahmanna sawrkar in siam sak turin an ngen tih a sawi a ni.

Pu Lalmalsawma chhuan ZPM in Health Care chungchangah ngei a, mahse tunah thuneihna an chan hnu hian an ruahmanna neih kha a hmantlak ta lo nge, an ti hleithei ta lo an hre lo a ti a, hetihlai hian Health Care mamawh tu an tam em em a, a tuartu mipui an nih avangin hma la ngei turin an phut tlat tih a sawi bawk.

Dr. Biakthansangi chuan Health Care ruahmanna thar chu October thla chung ngeia kalpui an tum thu leh a hlui pawh hman theih tura engemaw chen pawhsei chungchang an ngaihtuah thu Congress party hruaitute hi a hrilh a ni.

<><><>

MSPMC

Mizoram State Project Monitoring Committee Team-te chuan an Vice Chairman Pu R. Lal Rinawma hovin Aizawl Civil Hospital Cardiology Department, MINECO-a AYUSH Development Centre, leh Khatlaa Veterinary Information & Resource Centresak hna kal mek chu nimin khan an endik a.

MSPMC Team-te hian Cardiology Department hman lai mek hi hna tan anih theih nan suan mai na tur hmun awl remchang a awm loh avanga hnathawh kawnga harsatna an tawh leh Sorkar atanga sum release har avanga harsatna an tawh hrang hrangte sut kian dan tur an sawi hi a, building dang an endik pawh, a sak hna kal mek chu tha tak leh chak taka a kal theihna tura hmalak chhonzawm dan tur Nodal & Implementing Department hotute leh contractor-te sawipui a ni bawk.

<><><>

SERCHHIP DC PRESS CONF

Serchhip DC Pu Paul L.Khuma'n Dist hmasawna atana thawhpuih Serchhipa chanchibumite a sawm a.

Serchhip DC Pu Paul L.Khuma chuan vawiin khan Serchhip District MJA te ko khawmin DC meeting Hall-ah an inkawm a, Pu Paul L.Khuma chuan District tana a hmathlir sawiin computer leh internet behchhana rang tak leh awlsam zawka inrelbawlina kalpui theihna tur Digital District te; environment humhalh zawnga sawrkar leh mipui inrelbawlina kalpui Green District te; sawrkar department hrang hrang te leh mipui ten District hmasawna tura thawhhohna - convergence mumal taka an kalpui theih dan tur kawng dap te; kal dan phung pangngai thlak danglama dan hnuai hve ngaihtuahna leh thlirna thar nen District hmasawna hnathawh tul a tih thu a sawi.

DC chuan khua leh tuiten sawrkara an harsatna leh vuivaina an thlen theihna tur leh an chanvo te an zawhfiah theihna tur Mipui Aw hman tangkai thiam a tul, tih a sawi a. Mipui mimirin sawrkar hnathawh an vil theihna tur kawng a buatsaih - Mizoram Right to Public Services Act te chu mipuiin tangkai lehzuala an hman thiam a ngai, a ti a. Awmze nei zawka sawrkar hnathawh ten hna an

thawh theih nan Result framework Document (RFD) te pawh Serchhip District ah hman theih a ni dawn em tih an zirchian mek thu Pu Paul L.Khuma chuan a sawi a ni.

DC Pu Paul L.Khuma chuan National Highway 54 chungchanga complain lut te a hmun ngeiah official ten an endik a, an hmuhdan report te ngaihthlak leh sawiho a nih tawh thu Journalist te hi a hrilh a. NHIDCL hnuai contractor te kokhawmin kawng laih vanga harsatna thleng chi hrang hrang te chinfel dan an ngaihtuahho dawn tih a sawi a ni.

Vawiin meeting-ah hian hian MJA Serchhip Dist member te chu an President Pu C.Lalhminghluva hovin an tel a ni.

<><><>

SC NEW JUDGES

Justice N.Kotiswar Singh leh Justice R. Mahadevan te chu Supreme Court Judge atan vawiin khan President Draupadi Murmu-i chuan a ruat. Justice N. Kotiswar Singh hi tunah hian Jammu and Kashmir and Ladakh High COurt Chief Justice ni lai a ni a, Justice R.Mahdevan hi Madras High Court judge nilai a ni thung a. Union Law and Justice Ministry chuan Supreme COurt judge thar te hian an hna an zawm ni atangin ruat an nihna hi hman tan a ni a ti.

<><><>

J&K

Jammu & Kashmir-a firfiak ralthuam rip tak kengten an nizana an kahhliam sipai panga chu vawiin khan an hliam tuar loin an thi. Thudawn danin Nizan khan Doda district-a Dhari Gote ah Rashtiya Rifles leh J&K Police Special Operations Group te chuan firfiak dapchhuah beihpui an thlak a. Firfiakte nen hian inkap zuiin sipai panga chuan hliam na tak an tuar a. Heng zipai zingah hain officer pakhat telin vawiin khan an hliam tuar lovin an thi a ni. J&K Lieutenant Governor Manoj Sinha chuan sipai thite hi an raung chungah zahna a hlan a ni.

<><><>

NEET UG

Central Bureau of Investigation CBI chuan NEET-UG paper leak thubuaiah mi pahnih a man belh. He pawikhawihnaa inhnamhnawiha puh pakhat zawk hi Jharkhand-a Bokarpa cheng niin Hazaribagh-a National Testing Agency truck atanga NEET UG exam paper rua puh a ni a. Vawiin khan Patna ah man a ni a. Vawiina man ve dang pakhat hi exam paper rukchhuahnaa lo pui tu nia hriat a ni.

Vawiin thlengin CBI chuan NEET UG exam paper putru thubuaiah hian rinhlelh mi 14 a man tawh a. An zingah hian Jharkhand-a Hazaribagh-a school principal leh vice principal te pawh an tel a ni.

CBI bakah hian state police te chaun NEET UG paper putru hi ngawrh takin an chhui reng a. Puan tawh angin NEET-UG hi rampum huap exam niin medical course zir turte tana exam thin a .

<><><>